

ЯФНСТ

СЕАТНТЕНО

КЕНТАРНО

АНТРОПОНТУ

ПЕНТАНОЛЬСКОЯНУ

ЭГНИСКОЯНУ

ЧУДОТЕОРЦУ

## Кондак 1

Православия звезду новосветлую и Церкви новозданное ограждение  
воспоим в веселии сердечном Нектария богомудраго. Прославлен во Духа  
действом, исцелений точит благодать независтную вопиющим:

Радуйся, Нектарие, Эгинский чудотворче.

## Икос 1

Человек небомудренный явился еси в мире, Нектарие, святителю  
Христов: житие бо преподобное исправив непорочно, свят и богоприятен во  
всем нарекся еси; сего ради слышиши от нас:

Радуйся, от юности Бога возлюбивый;

Радуйся, во юдоли плачевней светлое восхождение положивый.

Радуйся, мудрости сосуде златозданный;

Радуйся, проповедниче благодати невозбранный.

Радуйся, доме святейший действия Божественнаго;

Радуйся, книго богоизваянная жития новаго.

Радуйся, яко ныне поревновал еси святым;

Радуйся, яко ангелов исполнил еси веселия.

Радуйся, преподобных отцев прекрасная доброто;

Радуйся, иерархов Христовых благое украшение.

Радуйся, имже Церковь Христова ликовствует;

Радуйся, имже остров Эгинский радуется.

Радуйся, Нектарие, Эгинский чудотворче.

## Кондак 2

Взором духовным, еще сый юноша, прозрел еси Божественную  
благодать, еюже объят в душе, свету заповедей Господних, преподобне,  
избрал еси последовати от юности, Христу поя: Аллилуиа.

## Икос 2

Притекше во град Константина, Нектарие, Божественным направляем  
страхом, в нем лучшим поучашеся. Темже Божественнаго разумения  
преисполнен явился еси, возвеселяя во учениих твоих вопиущия ти таковая:

Радуйся, Солнца мысленнаго палато благоукрашенная;

Радуйся, рая словеснаго древо досточудное.

Радуйся, Христа Спасителя служителю богоприятный;

Радуйся, отцем древним единомравный.

Радуйся, камению новосечный умнаго наздания;

Радуйся, венче новоплетенный Святых Церкви.

Радуйся, непостыдное наше упование;

Радуйся, светлая наша надежда.

Радуйся, яко безплотный бывый в телеси;

Радуйся, даром богомудрия просветивыйся в душе.

Радуйся, образов небесных сокровище;

Радуйся, добродетелей ангелоподобных озарение.

Радуйся, Нектарие, Эгинский чудотворче.

### Кондак 3

Славныя Божественныя мудрости всеобразно возжелев и тоя измлада  
взыскав, Христа моляше теплыми слезами улучити краснейшаго желания и,  
достигнув онаго, верно вопияше: Аллилуна.

### Икос 3

Веселил еси душу твою, якоже древле Отцы Василий со Григорием,  
стяжанием наук, во Афинах учився, Нектарие; темже твоими  
богоблагодатными дарованиями наслаждающися тебе вопием:

Радуйся, верное послушания чадо;  
Радуйся, твердое благочестия основание.  
Радуйся, мира суетнаго превышший;  
Радуйся, миру неложному приложивыйся.  
Радуйся, ум богоносный, исполнь Божественных разумений;  
Радуйся, угль, воспламеняяй Божественнаго Духа огонь умный.  
Радуйся, началосветлыя образы воистинну прозревый;  
Радуйся, плоды учения земнаго Богу Небесному вознесый.  
Радуйся, любовь Христову исполнивый житием;  
Радуйся, добродетелей цветение возобразивый духом.  
Радуйся, верных новоутвержденная ограда;  
Радуйся, врагов смертоносное поражение.  
Радуйся, Нектарие, Эгинский чудотворче.

### Кондак 4

Ревностию исполненный ко Господу Богу нашему, блаженне Нектарие,  
преподобных Отцев равноангельнаго жития вожделев, на Хиосе облечеса  
благочестно во иноческий образ небесный и врага низложи во еже пети присно  
Господеву: Аллилуна.

### Икос 4

Услыша твою молитву Владыка небесе и земли, егда вzywаше к Немю  
из сердца, и повеле морю, — и преложися в тишину морское волнение,  
преподобне: дивящееса же вси спасеннии, верно вопияху:

Радуйся, источниче чудес неисчерпаемый;  
Радуйся, исцелений реко приснотекущая.  
Радуйся, света духовнаго преозарение;  
Радуйся, благодати Божественныя доброзрачное сияние.  
Радуйся, сосуде многочестный даров небесных;  
Радуйся, саде новосажденный добродетелей райских.  
Радуйся, яко морское треволение утишаеши;  
Радуйся, яко словом любве всякое зло избличаеши.  
Радуйся, Христов новый избранниче;  
Радуйся, благодати усердный провозвестниче.  
Радуйся, Духа Истины обретыи познание;

Радуйся, Источника Жизни напоенный струями.  
Радуйся, Нектарие, Эгинский чудотворче.

#### Кондак 5

Дивен явился еси в последние дни, святителю Христов, отче Нектарие, в житии праведнем изобразив явственнейше нравы твоими житие древних богоносных святых, и, прославлен чудесы, от напастей спасаеши всех, вопиющих Богу: Аллилуиа.

#### Икос 5

Избранием богоразсудным иерарх богомудрый воистинну показался еси во Египте и Пентаполю пастырь явился еси Божественный, аки Павел великий; темже убо житию твоему дивляхуся вернии людие, вопиюще:

Радуйся, за законы отеческия твердо подвизавыйся;  
Радуйся, на камени заповедей Господних стопы твоя утвердивый.  
Радуйся, во Египте учение истинное возвестивый;  
Радуйся, паству твою от Египта мысленнаго спасый.  
Радуйся, палато кротости и любве сокровище;  
Радуйся, просвещение разума и мудрости вместилище.  
Радуйся, яко явился еси Церкви земная украшение;  
Радуйся, яко показался еси верных благое утверждение.  
Радуйся, правило изряднаго жития;  
Радуйся, образе благочестия и мудрости.  
Радуйся, иерарше, веру православную возвысивый;  
Радуйся, писаньми твоими зловерие обличивый.  
Радуйся, Нектарие, Эгинский чудотворче.

#### Кондак 6

Украшение Христовы Церкви во Египте явился еси, Нектарие, яко Евангелия делатель истинный; сего ради стяжавше тя водителя Божественнаго, отче, верных лица лучшему поучахуся, вопиюще с тобою Господеви: Аллилуиа.

#### Икос 6

Возсиявый яко Апостол иный во стране Элинстей, озаряеши благочестивых сердца сиянием Божественных учений и светом жития твоего, преподобне; темже убо светлостию твоею световодимии верно вопием:

Радуйся, таинство Троицкаго Божества прославивый;  
Радуйся, апостольскую ревность стяжавый.  
Радуйся, силу Божию в немощи явивый;  
Радуйся, исцелений благодать показавый.  
Радуйся, витие боговещанный глаголов жизни;  
Радуйся, водителю премудрый слова Благодати.  
Радуйся, яко очищаеши душевная расположения;  
Радуйся, яко сообразуеши сердечная смотрения.  
Радуйся, верных учителю великий;

Радуйся, Христа таинниче презрядный.  
 Радуйся, тайноводителю во Обители Небесных;  
 Радуйся, стяжавый в мире обогащающую нищету.  
 Радуйся, Нектарие, Эгинский чудотворче.

#### Кондак 7

Велий во иерарсех и премудрых учителей яко таинник смирения явился еси, Нектарие: твоя богомудрая писания оставил еси Церкви, святе, имиже верно услаждающеся, Прославльшему тя Богу вопием: Аллилуиа.

#### Икос 7

Нектар праведности и благодати Божия росу, чудотворче святыи Нектарие, аки облак духовный во время бездождия нам даровал еси, веселя души наша и подвизая вопити тебе:

Радуйся, роса утешения;  
 Радуйся, воду благодати нам источивый;  
 Радуйся, исцелений струй отверзый.  
 Радуйся, весно святости в зиме духовней;  
 Радуйся, сияние новопросвещенное во мраце ветсем.  
 Радуйся, даром чудес обогащенный;  
 Радуйся, духом разсуждения преосененный.  
 Радуйся, исцелителю недугов всехвальный;  
 Радуйся, наставниче во благодати презрядный.  
 Радуйся, демоны аки пламень пожигаяй;  
 Радуйся, страстей душепагубных свободяй.  
 Радуйся, Нектарие, Эгинский чудотворче.

#### Кондак 8

Странная чудеса, отче, рака твоих мощей источает и спасает яже в трудех скончавающих житие свое: сего ради во обитель твою святую отвсюду стекаются людие, цельбы и избавления многообразная от тебе получающе и вопиюще Богу: Аллилуиа.

#### Икос 8

Пристанище необуреваемое, блаженне, на острове Эгинстем явил еси обитель твою Божественную, в нейже инокинь честных окормитель мудрый соделался еси, о Христе сия, преподобне, мудро наставляя, вопиющия:

Радуйся, похвало девства;  
 Радуйся, образе монашескаго жития.  
 Радуйся, смиренномудрия гроздие преукрашенное;  
 Радуйся, долготерпения сокровище Божественное.  
 Радуйся, священнаго безмолвия преосенение;  
 Радуйся, трезвения духовнаго благорастворение.  
 Радуйся, воздержания святилище чистое;  
 Радуйся, богоподобия одушевленное изображение.  
 Радуйся, святолепное осияние целомудрия;

Радуйся, богоизбранное изваяние чистоты.  
 Радуйся, оросивый душу твою слезами покаяния;  
 Радуйся, тех струями обновивый зрение духовное.  
 Радуйся, Нектарие, Эгинский чудотворче.

#### Кондак 9

Исполнена есть благодати Божественная и обоняния небеснаго рака  
 мощей твоих, Нектарие, угодниче Христов: имже не токмо обитель твоя, но и  
 весь остров Эгинский радуется, и вси освящаются сих благодатию, вопиюще  
 Богу: Аллилуна.

#### Икос 9

Струи Божественная источают многоцелебная мощи твоя, чудотворче  
 святой Нектарие, богатым даром небесным исцеления многим подают и  
 недугов скверну омывают: темже дивящися славе твоей, юже стяжал еси,  
 усердно вопием:

Радуйся, проповедниче благодати невозбранный;  
 Радуйся, возвестителю истины нелицемерный.  
 Радуйся, скорый помощниче в бедах;  
 Радуйся, велие утешение в напастех.  
 Радуйся, источник многотекущий милосердия Отчаго;  
 Радуйся, гроздие сладчайшее веселия духовнаго.  
 Радуйся, яко раковаго мучительства прекращаеши недуг;  
 Радуйся, яко демонскую разрушаеши дерзость.  
 Радуйся, мудрецов светных смущение;  
 Радуйся, верных нерушимое единение.  
 Радуйся, щите веры, имже вернии ограждаются;  
 Радуйся, вещание истины, имже бесловы обращаются.  
 Радуйся, Нектарие, Эгинский чудотворче.

#### Кондак 10

Покров тя и предстателя всяк верный именует, улучая от тебе помощь:  
 кто бо, призвав тя с верою, не получил еси твоея, отче, благодати? Всем бо  
 скоро просимое подаеши, вегда звати: Аллилуна.

#### Икос 10

Многих твоих чудес во вся концы изыде вещание, богоносне и  
 всеблаженне Нектарие, ты бо ближним и дальним поспешаеши на помощь,  
 святе, и спасаеши бедствующия, и предстательствуеши вопиющим:

Радуйся, чудотворяя предивно велия и преславная;  
 Радуйся, подаваяй всем яже ко спасению благопотребная.  
 Радуйся, древняя исполнимый во дни наша;  
 Радуйся, пророчески предреченная показавый ныне.  
 Радуйся, истинная веры торжество;  
 Радуйся, спасительное христиан привежище.  
 Радуйся, яко являеши истины славу;

Радуйся, яко заграждаєши беззаконія уста.  
 Радуйся, радосте верных и утверждение;  
 Радуйся, душ смятенных веселие и крепосте.  
 Радуйся, имже Христос прославися;  
 Радуйся, имже сатана посрамися.  
 Радуйся, Нектарие, Эгинский чудотворче.

### Кондак 11

Песнь благодарственную тебе воспевает, блаженне Нектарие, угодниче Христов, спасаемии твоими предстательствы, во всякой бо нас нужде от нашедших свободаети скорбей: темже твое заступление проповедаем, Христу поюще: Аллилуиа.

### Икос 11

Попаляєши демонское лютое неистовство огнем священных чудес твоих, чудотворче Нектарие, и скоро помогая верным, тяжких болезней угашаети зной, исцеляя страждущия, вопиющия ти во умилении:

Радуйся, пучино щедрот неистощимых;  
 Радуйся, море чудес недомыслимых.  
 Радуйся, болящих исцеление;  
 Радуйся, разслабленных скорое исправление.  
 Радуйся, унынием плененных основание;  
 Радуйся, отчаянных прибежище.  
 Радуйся, возстание падших и вразумление;  
 Радуйся, заблуждающих наставление.  
 Радуйся, источниче, благодарования источаяй;  
 Радуйся, светильниче, омраченныя просвещаяй.  
 Радуйся, благочестия богодарованная сило;  
 Радуйся, утешителю всех приходящих к тебе.  
 Радуйся, Нектарие, Эгинский чудотворче.

### Кондак 12

Благодать Утешителя богато излилася от раки честных мощей твоих: гроб бо твой святой, Нектарие, яко приснотекущий источник точит непрестанно исцеления и напояет Божественными струями благодати всех, вопиющих Господеви: Аллилуиа.

### Икос 12

Воспевая всесовершенно Трисвятую песнь Богу с лики ангельскими, Нектарие, воззри свыше на нас и даруй, всесвяте, вся потребная верою к тебе притекающим и не престающим вопияти:

Радуйся, отрасли Силврии благословенная;  
 Радуйся, Эгины известная похвало.  
 Радуйся, Эмады велие украшение;  
 Радуйся, чудотворче, во всем мире прославивыйся.  
 Радуйся, образе иерархов честных;

Радуйся, монашествующих покрове и спасение.  
 Радуйся, Церкви светило новосветлое;  
 Радуйся, Православия неколеблемое утверждение.  
 Радуйся, имже страстей очищение примем;  
 Радуйся, имже к Богу восхождения улучим.  
 Радуйся, возсиявая в сердцах наших свет Господень;  
 Радуйся, и о мне ходатаю ко Творцу.  
 Радуйся, Нектарие, Эгинский чудотворче.

### Кондак 13

О Божественный отче, православных христиан верное упование,  
 Нектарие, святителю Христов, престолу Господню предстоя ныне, испроси  
 нам у Христа Бога прегрешений оставления и всемилостиваго низхождения,  
 яко да возопием Ему всечестно: Аллилуиа.

*Этот Кондак читается трижды, затем Икос 1-й и Кондак 1-й*

### Молитва святителю Нектарию

О Богомудрый и всесвятый отче Нектарие, святителю Христов,  
 чудотворче великий и преславный. К тебе ныне прибегаем верою и любовью  
 чтущии тя, похвалы сия приносяще от всего сердца и помышления. Ты,  
 угодниче Божий, явился еси ныне яко звезда утренняя, озаряющая мира сего  
 помраченныя концы светом благодати Христовой, юже стяжал еси неложно  
 смиренным житием твоим и кроткими нравами, нетленных и премирных  
 обетований сподобльшеся. Сего ради мы, недостойнии, молим тя прилежно:  
 отче святыи Нектарие, не забуди нас, к тебе усердно притекающих. Свет  
 сый ныне, просвети души наша, помраченныя страстьми, озари наш ум и  
 обнови помышления во еже поучатися нам Божественным и священным  
 образом и нектому о суетных пещися. Утверди нас, преподобне отче, в вере,  
 надежде и любви ко Господу Богу нашему, исцели болезни душевныя и  
 телесныя, буди нам покров и прибежище в скорбех и напастех, вразумление и  
 исправление во гресех, благодать независтную подающе всегда, яко да  
 прославим Единого Истинного Бога, дивного во святых Своих, Отца и Сына и  
 Святаго Духа, ныне и присно и во веки веков. Аминь.

### Молитва иная

О, мироточивая главо, Святителю Нектарие, Архирею Божий! Во  
 времена великаго отступления, нечестию мир пленившу, благочестием  
 просиял еси и главу прегордаго Денницы, язвляющего нас, сокрушил еси. Сего  
 ради дарова ти Христос врачевати язвы неисцельны, за беззакония наша нас  
 поразившия. Веруем: возлюби тя Бог праведнаго, да тебе ради нас, грешных,  
 помилует, от клятвы разрешит, от недуг избавит, и по всей вселенней  
 страшно и славно будет имя Его, Отца и Сына и Святаго Духа, ныне и присно  
 и во веки веков. Аминь.